

Agong imbau kenangan manis bersekolah rendah di Pekan

Oktober 20, 2023 @ 9:09pm



Al-Sultan Abdullah berkenan berangkat ke kelas yang pernah didudukinya bersama rakan alumni SK Ahmad, yang turut sama menghadiri majlis itu. - Foto Bernama

PEKAN: Bermain guli di bawah lantai kelas, memetik rambutan sehingga terjatuh dan lincah beraksi di padang bola sepak antara nostalgia manis zaman sekolah rendah Yang di-Pertuan Agong Al-Sultan Abdullah Ri'ayatuddin Al-Mustafa Billah Shah.

Yang di-Pertuan Agong bertitah Sekolah Kebangsaan (SK) Ahmad di sini yang terletak kira-kira dua kilometer dari Istana Mangga Tunggal, iaitu tempat Seri Paduka Baginda dilahirkan, merupakan institusi pertama Al-Sultan Abdullah menimba pendidikan formal ketika memasuki darjah satu pada 1966.

"Semasa itu, sekolah ini (diperbuat) daripada kayu dan bila kita semua berlari di kelas, bising bunyinya... di bawah lantai pula tempat kita bermain dan selalunya bermain guli dan ada kalanya, ada air menitis.

Di padang sekolah ini juga kita beraksi bermain bola sepak dan saya antara pemain bola terhebat di sekolah dan mewakili Pahang semasa darjah tiga. Banyak kenangan manis-manis saya di sini, termasuk berbasikal dari Istana Mangga Tunggal ke sekolah," titah Seri Paduka Baginda.

Al-Sultan Abdullah berkenan mengimbau kenangan persekolahan itu dalam Titah Diraja ketika menyempurnakan Majlis Pemasyhuran SK Ahmad dan Sekolah Menengah Kebangsaan (SMK) Ahmad di sini hari ini.

Turut berangkat, paduka anakanda Pemangku Raja Pahang Tengku Hassan Ibrahim Alam Shah, Tengku Panglima Raja Kolonel Tengku Amir Nasser Ibrahim Shah dan Tengku Panglima Perang Tengku Ahmad Ismail Mu'adzam Shah.

Hadir sama, Menteri Pendidikan, Fadhlina Sidek dan Pengerusi Jawatankuasa Pertanian, Industri Asas Tani, Bioteknologi dan Pendidikan Pahang, Datuk Seri Mohd Soffi Abd Razak.

Pada majlis itu, Al-Sultan Abdullah juga berkenan SK Ahmad dan SMK Ahmad yang mula beroperasi pada 1926 dinamakan sebagai SK Sultan Ahmad dan SMK Sultan Ahmad, sempena Sultan Pahang moden pertama Sultan Ahmad Al-Muadzam Shah.

Al-Sultan Abdullah juga berkenan berangkat ke kelas yang pernah didudukinya bersama rakan alumni SK Ahmad, yang turut sama menghadiri majlis itu.

Pada titah itu, Al-Sultan Abdullah juga berkenan berkongsi kenangan memanjat pokok rambutan bersama 20 rakan sekolah, yang dijemput Seri Paduka Baginda ke istana untuk bermain bola sepak.

"Tapi nasib saya tidak baik... kita sebagai budak-budak hendak melakukan aksi lagak ngeri macam Tarzan tapi tak nampak dahan ada lumut menyebabkannya licin. Bila pegang, saya terjatuh dan patah tangan.

Daripada 20 orang di situ, ramai yang lari dan tinggal tiga, empat kerat (orang) sahaja. Mereka yang beritahu orang (di) istana dan semua panik. Selepas kejadian itu, tahun 1970 ayahanda dan bonda saya bersetuju pindah ke Kuantan," titah Seri Paduka Baginda.

Al-Sultan Abdullah bertitah Seri Paduka Baginda terputus hubungan dengan rakan-rakan selepas bersemayam di Kuantan, namun berasa bangga apabila mengetahui rakan-rakannya berjaya dalam pendidikan termasuk ada yang bergelar lulusan universiti luar negara.

Khusus kepada golongan pendidik di dua sekolah itu, Al-Sultan Abdullah bertitah untuk sentiasa berusaha meningkatkan prestasi sekolah bagi melahirkan bakal pemimpin Pahang dan Malaysia, amnya.

Al-Sultan Abdullah juga menzahirkan rasa bangga dengan kejayaan Maahad Tahfiz Negeri Pahang (MTNP) yang ditubuhkan hasil cetusan ilham Seri Paduka Baginda dan Menteri Besar sebelum ini Tan Sri Adnan Yaakob, telah menunjukkan prestasi sebagai antara yang terbaik di dalam negara.

MTNP yang ditubuhkan di bawah Yayasan Pahang, menurut Seri Paduka Baginda mencapai kejayaan itu menerusi sistem pengajaran dan pembelajaran yang unik dan baik, menjadikan kokurikulum di MTNP akan dijadikan rujukan untuk institusi pendidikan di bawah Kementerian Kemajuan Desa dan Wilayah. – BERNAMA